

20/11/1998

Negara pro-Yahudi sokong reformasi

Melayu Yang Sedar

DARIPADA kenyataan yang dibuat oleh Naib Presiden Al Gore, jelaslah sekarang apa yang tersirat di hati Amerika Syarikat, yang terang-terang menyokong tindakan reformasi dan rusuhan di jalan raya.

Sesungguhnya sebagai umat Islam dan orang Melayu kita harus percaya ini adalah petunjuk daripada Allah supaya membuka mata kita untuk mencari kebenaran.

Tanpa berselindung lagi, gerakan reformasi jelas mendapat sokongan sebuah negara pro-Yahudi.

Golongan ini gagal melemahkan pengaruh kerajaan pimpinan Perdana Menteri, Datuk Seri Dr Mahathir Mohamad yang kuat pegangan nasionalismenya.

Pelbagai isu ditimbulkan seperti kronisme, nepotisme dan sebagainya yang sememangnya digunakan oleh gerakan reformasi semata-mata untuk mengelirukan rakyat bagi menjatuhkan kepemimpinan negara.

Kita juga tertanya-tanya apakah selama ini pemimpin yang diperjuangkan oleh gerakan reformasi mendapat galakan Amerika untuk meneruskan agendanya?

Tuhan saja yang tahu. Selama ini kita juga tahu apa yang terjadi di Indonesia sebahagiannya direstui Amerika.

Yang menderita adalah rakyat Indonesia yang majoritinya adalah orang Islam.

Apakah kita juga mahu menderita hanya kerana sokongan Amerika terhadap gerakan reformasi dan rusuhan hanya kerana membela seorang pemimpin yang rapat dengan mereka?

Tindakan mereka itu hanya mahu menjatuhkan Perdana Menteri yang sebenarnya kita akui selama ini sedaya upaya mempertahankan kedaulatan negara ini.

Dengan kenyataan dan sokongan yang diberikan oleh Al Gore ini mungkin penyokong gerakan reformasi berasa gembira dan boleh mendabik dada. Tapi apa gunanya kalau sokongan itu datang dari sebuah negara pro-Yahudi. Mungkin penyokong reformasi tidak kisah semua ini.

Bagi mereka apa yang penting matlamat mereka tercapai. Kita simpati tetapi janganlah sampai berkiblatkan mereka.

Kalau selama ini penyokong reformasi sering melaungkan 'Allahu Akhbar' dalam setiap demonstrasi yang disertai mereka, maka sememangnya Allah itu Maha Besar.

Allah membuka mata kita apa yang diperkatakan oleh Perdana Menteri selama ini ada kebenarannya.

Sedarlah kita masih belum terlambat.